

## 2 PITA

<sup>1</sup> E Saimon Pita. E Yesus Kristus aqa wau tamo. A na e qarinbej deqa e aqa anjam mare mare laqnum. Yesus Kristus a gago Qotei. A kumbra bole yeqnu qaji tamo. A iga padalo sawaq na elenej. Niñgi iga ti Yesus qa gago areqalo singilateqnum.

<sup>2</sup> Niñgi gago Tamo Koba Yesus aqa Abu Qotei wo nañgi aiyel qa bole qalieonub. Deqa Qotei a ningi qa are tulanç boleiyosim nunjo are latetnjeme.

### *Niñgi Qotei aqa segi tamo ungasari tiñtin unub*

<sup>3</sup> Yesus Kristus a segi Qotei. A siñgila koba ti unu. Iga a qa bole qalieonum deqa a na iga ñamble qa ti Qotei aqa kumbra qa ti tulanç keretgej. Osiqa aqa segi rianj na ti so bole na ti iga metgej.

<sup>4</sup> A na lañ qure qa ingi bole bole iga egej. A nami ingi di iga egwa marej. Ingi di tulanç boledamu. Mandam tamo ungasari nañgi kumbra uge uge yqajqa are prugnjreqnu. Kumbra dena nañgi ugetnjreqnu. Deqa ijo was, niñgi kumbra di uratosib Qotei aqa segi kumbraq di soqniy.

<sup>5</sup> Niñgi Yesus qa nunjo areqalo singilateqnum deqa niñgi kumbra bole bole yqajqa waukobaoqniy. Osib dena niñgi Qotei qa bole qalieosib soqniy.

<sup>6</sup> Osib dena niñgi nunjo segi jejamu geregere taqatoqniy. Osib dena niñgi gulbe qobooyoqnsib siñgila na tigelesoqniy. Osib dena niñgi Qotei aqa kumbraq di sosib walweloqniy.

**7** Osib dena ningi nuŋgo Kristen was naŋgi geregereinjroqniy. Osib dena ningi qalaqlaiyo kumbra dauryosib soqniy.

**8** Kumbra bole deqaji nuŋgoq di tulaŋ kobao-qneme. Amqa ningi gago Tamo Koba Yesus Kristus qa bole qaliegab. Nuŋgo qalie di loumqa keresai. Qalie di nuŋgoq di tulaŋ siŋgilaoqnsim gei gargekoba atelenqas.

**9** Kumbra bole deqaji tamo qudei naŋgoq di sosai deqa naŋgi ɣam qandimo bul unub. Naŋgi geregere ɣam atqa keresai. Bole, Qotei a nami tamо naŋgi di naŋgo une kobotetnjrej. Ariya naŋgi deqa olo are walŋreqnu.

**10** O ijo was kalil, Qotei a nami ningi giltŋgosiq metŋgej deqa ningi aqa segi tamо uŋgasari tiŋtiŋ sqajqa siŋgilaoqniy. Ningi degyqab di ningi ulonqa keresai.

**11** Qotei na gam waqtetŋgoqnimqa gago Tamo Koba Yesus Kristus agi iga elenjej qaji a nuŋgo Mandor Koba sosim ningi taqatŋgimqa ningi so bole gaigai sqab.

**12-13** Bole, ningi ijo anjam endi qalieosib Qotei aqa anjam bole kalil siŋgila na ojejunub. Ariya ningi ijo anjam endeqa olo are walŋgaim deqa e mandamq endi sosiy bati gaigai ningi mernŋgoqnsiy nuŋgo areqalo tigeltetŋgoqnqai. E kere degye-qnum.

**14** E qalieonum, sokiňala e ijo jejamu uratosiy moiqai. Gago Tamo Koba Yesus Kristus na e degsi merbej.

**15** Deqa e ijo anjam endi ningi mernŋgoqnsiy. Mernŋgoqnsiy bunuqna e moiwitqa ningi ijo anjam endeqa gaigai are qaloqnsib sqab.

*Qotei a Yesus ñam kobaquja yej*

<sup>16</sup> Iga nami gago Tamo Koba Yesus Kristus aqa singila qa ti a bqajqa bati qa ti niŋgi anjam merŋgeqnam niŋgi quoqneb. Iga anjam di merŋgoqnem bati deqa iga mandam tamo naŋgo sa anjam dauryosaioqnem. Iga segi na Yesus aqa rianj ti manjwa ti unsim deqa niŋgi saiŋgoqnem.

<sup>17</sup> Iga endegsi unem. Abu Qotei na Yesus ñam koba yosiqa aqa segi rianj ti manjwa ti Yesus aqaq di atej. Osiqa Yesus qa endegsi marej, “Endi ijo Anŋro e na qalaqalaiyeqnum qaji. E a qa tulanj areboleboleibeqnu.”

<sup>18</sup> Iga Qotei aqa getento manaq di Yesus ombla sonamqa Qotei a laŋ goge na anjam di marnaq iga quem.

<sup>19</sup> Deqa iga bole qalieonum, Qotei aqa medabu o qaji tamo naŋgo anjam nami maroqneb qaji di anjam bole. Deqa niŋgi naŋgo anjam di torei ojiy. Niŋgi ojqab di bolequja. Naŋgo anjam di wanjal bul sawa ambruq di puloŋeqnu. Pulonjosiqa nebe qa burbas oqeŋnu dego kere nunŋo are miligiq di suwaŋeqnu.

<sup>20-21</sup> O ijo was, niŋgi endegsib qalieoiy. Qotei aqa medabu o qaji tamo naŋgi nami anjam maroqneb neŋgreŋq di unu. Naŋgo anjam maroqneb qaji di naŋgi mandam tamo naŋgo areqalo na marosaioqneb. Mondor Bole na naŋgo areqalo tigeltenjreqnaqa naŋgi Qotei aqa medabu oqnsib anjam maroqneb.

## 2

*Bunuqna tamo qudei naŋgi bosib gisaj anjam  
koba maroqeqab*

**1** Bole, gisañ anjam maro tamo nañgi Israel nañgo ambleq na tigelosib anjam maroqneb. Nañgi Qotei aqa medabu o qaji tamo bolesai. Bunuqna nunjo ambleq na dego tamo deqaji nañgi lumu tigelosib gisañ anjam koba ninji mernjgoqnqab. Yimqa ninji qudei nañgo anjam dauryosib padalqab. Tamo nañgi dena Gate Koba Yesus nami nañgi awainjrej qaji a qoreiyooqnqab. Deqa mondon nañgi urur padalqab.

**2** Gisañ tamo nañgi di kumbra uge uge yoqnibqa tamo ungasari gargekoba nañgi na nañgo kumbra di dauryosib Qotei aqa gam bole misilinyqab.

**3** Gisañ tamo nañgi di mamaul ani deqa nañgi bosib nunjo silali ingi ingi gisañ na yainjgoqnqab. Tulanj nami Qotei na gisañ tamo nañgi di pegijnjrqa bati atsiqa nañgi qa endegsi marej, “E nañgi padaltnjrrougetqai.” Od, tamo nañgi di bole padalqab. Qotei a nañgi padaltnjrqa bati qa tarinjeqnu.

**4** Niñgi qalie, nami lan añgro qudei nañgi une atoqneb. Deqa Qotei na nañgi uratnjrosai. A nañgi ojsiqa sub guma kobaq di breinjrej unub. Sub di ambru koba. Sub dia ñamyuwo unu. Dia lan añgro nañgi tarinjeseqniqbä mondon Qotei a nañgo une qa pegijnjrsim awai uge enjrqas.

**5** Tamo ungasari Noa aqa bati qa soqneb qaji nañgi Qotei qoreiyeb deqa Qotei na nañgi dego uratnjrosai. A nañgi padaltnjrej. Awa koba aisiqa mandam ya maqonaqa dena Qotei na nañgi padaltnjrej. Ariya Qotei a Noa padaltosai. Noa a Qotei aqa anjam palontoqnsiq tamo ungasari nañgi endegsi minjroqnej, “Niñgi kumbra bole dauryoqniy.” Deqa Qotei na Noa a ti tamo ungasari 7

naŋgi ti geregere taqatnırnaqa naŋgi bole soqneb.

<sup>6</sup> Sodom qure ti Gomora qure ti naŋgi dego Qotei na padaltnırqa marsıqa ɻamyuwo qarınjyonaq aisiq naŋgi koitnırnaq naŋgi torei padalekriteb. Deqa bunuqna tamo ungasari naŋgi Sodom Gomora ti naŋgi qa are qaloqnsib ulaoqnqab. Osib Qotei qoreiyqa uratqab.

<sup>7</sup> Lot a kumbra bole yoqnej deqa a Sodom qureq di sosiqa tamo uge uge naŋgi kumbra ugeteqn-abqa di unoqnsiqa are gulbekobaiyoqnej. Deqa Qotei na Lot olo osiqa sawa boleq di atnaqa a padalosai.

<sup>8</sup> Lot aqa kumbra bolequja. A Sodom qureq di bati gaigai naŋgo kumbra uge unoqnsiq naŋgo anjam uge dego quoqnej. Aqa are miligi tulan boledamu deqa naŋgi Qotei aqa dal anjam go-traŋyeq nabqa di unoqnsiq a prugugetoqnsiqa are tulan jaqatin̄kobaiyoqnej.

<sup>9</sup> O ijo was ningi quiy. Tamo Koba Qotei a nami kumbra kalil di yoqnej deqa iga qalieonum, tamo ungasari bini Qotei dauryeqnub qaji naŋgi gulbe iteqnabqa a na naŋgi elenqajqajqam di Qotei a segi qalie bole. Tamo uge uge naŋgo kumbra dego Qotei a qalie bole. Deqa mondon a na naŋgi peginjrsim awai uge enjrqas.

<sup>10</sup> Tamo qudei naŋgi kumbra tulan uge uge yeqnb deqa naŋgi awai ugedamu oqab. Tamo naŋgi di sambala kumbra tulan jигat yoqnnqajqajqare prugnjreqnu. Osib naŋgi endegsib are qaleqnb, “Tamo Koba Qotei aqa anjam kalil laŋa sa anjam. Deqa iga dauryqasai.”

Gisaŋ anjam maro tamo naŋgo kumbra tulan uge. Naŋgi kumbra endeqaji yeqnb. Naŋgi diqo-

qnsib naŋgi segi areqalo dauryeqnub. Naŋgi laŋ anŋro kokba naŋgi misiliŋjrqajqa ulaosaieqnub.

**11** Laŋ anŋro qudei naŋgi tulanŋ singila koba ti unub deqa naŋgi na laŋ anŋro kokba naŋgi di buŋnjreqnub. Ariya laŋ anŋro singila ti unub qaji naŋgi di diqosaieqnub. Naŋgi gisanŋ anjam maro tamo naŋgi bul sai. Deqa naŋgi Tamo Koba Qotei aqa ulatamuq di laŋ anŋro kokba naŋgi misiliŋjrosaieqnub.

**12** Gisanŋ tamo naŋgi di wagme juwaŋ bul tulanŋ nanarioqnsib laqnub. Naŋgi naŋgo segi jejamu qa areqalo uge uge dauryeqnub. Anjam naŋgi poinjrosai qaji di naŋgi olo misiliŋyeqnub. Iga wagme juwaŋ naŋgi ojeleŋoqnsim ŋumeqnum dego kere mondonŋ Qotei na gisanŋ tamo naŋgi di ŋumogetqas.

**13** Naŋgi kumbra uge uge yeqnub deqa bunuqna naŋgi gulbe koba itqab. Naŋgo kumbra agiende. Naŋgi qanam jige alaŋkobaoqnsibqa ya uge uyoqnsib nanarieqnub. Naŋgi kumbra di yqajqa tulanŋ areboleboleinjreqnu. Naŋgi niŋgi ti iŋgi uyoqnsib dena nujgo ŋiam ugetoqnsib niŋgi jiga eŋgeqnub. Naŋgi gisanŋ kumbra dauryqajqa tulanŋ areboleboleinjreqnu.

**14** Naŋgi gaigai uŋa qa mamaulnjreqnu deqa naŋgi sambala kumbra yqajqa are koba unu. Naŋgi une yoqnqajqa tulanŋ arearetnjreqnaqa olo uratosaeqnub. Naŋgi na tamo qudei areqalo aiye aiyelteqnub qaji naŋgi walawalainjreqnabqa naŋgi daurnjroqnsib une yeqnub. Gisanŋ tamo naŋgi di tamo qudei naŋgo iŋgi iŋgi qa mamaulnjreqnu. Naŋgi kumbra di yqajqa qalie bole. Deqa Qotei na naŋgi torei padaltnjrqas.

**15** Naŋgi Qotei aqa gam bole uratoqnsib nanari-oqnsib laqnub. Osib naŋgi Beor aqa aŋgro Balam aqa gam dauryeqnub. Balam a nami kumbra uge yoqnsiqa silali oqajqa tulan arearetoqnej.

**16** Donki naŋgi anjam marqa keresai ariya donki bei a tamo bulosiqa medabu waqtosiqa Balam aqa kumbra uge deqa ŋirinje. Onaqa Balam a qusiqa aqa nanari kumbra di olo uratej. Balam a nami gisaŋoqnsiqa maroqnej, “E Qotei aqa medabu o qaji tamo bole.”

**17** Gisan tamo naŋgi di ya sub bul jeŋo qaji. Jagwa na awa puyeqnaqa urur koboeqnu dego kere tamo naŋgi di babaŋ na tamo bole unub ariya naŋgi kumbra bole bei babtosaieqnub. Deqa mondonj Qotei na naŋgi sawa ambruq di breinjrqas. Sawa di Qotei na nami naŋgi gereiyetnjrej unu.

**18** Gisan tamo naŋgi di medabu waqtoqnsib diqoqnsib anjam uge uge marelenjeqnub. Naŋgi na tamo ungasari qudei naŋgi walawalainjreqnabqqa sambala kumbra yoqnsib naŋgo segi jejamu qa areqalo uge uge dauryeqnub. Tamo ungasari naŋgi di ya ya endi are bulyosib tamo naŋgi Qotei qaliesai qaji naŋgo kumbra urateb. Ariya gisan tamo naŋgi na naŋgi titnjreqnab naŋgi olo kumbra uge uge dauryeqnub.

**19** Gisan tamo naŋgi dena tamo ungasari naŋgi walawalainjroqnsib endegsib minjreqnub, “Ninji iga daurgwab di kumbra bei na ninji taqatŋwa keresai. Deqa unjum, ninji nunŋo segi areqalo na kumbra kiye yqa maroqnsib yoqniy.” Naŋgo anjam di gisan. Agi naŋgo segi kumbra uge uge na naŋgi tulan singila na ojoqnsiŋ naŋgi taqatnjre-qu. Ninji qalie, tamo bei aqa kumbra bei na a

taqatesqas di a kumbra di aqa kañgal tamo bul sqas.

**20** Bole, tamo ungasari nañgi di nami gago Tamo Koba Yesus Kristus agi iga elenjeq qaji a qa bole qalieeb. Nañgi degsib qalieeb deqa nañgi mandam qa kumbra jigat kalil urateb. Ariya bini nañgi puluosib kumbra jigat di olo dauryeqnub. Deqa kumbra dena nañgi siñgila na ojesonaq nañgo so tulañ ugeeqnu. Nañgo so uge namij dego sai. Nañgo so olo tulañ ugedamueqnu.

**21** Nañgi nami kumbra bole qa gam qaliesai qamu di kere. Ariya nañgi gam di qalieosib Qotei aqa anjam ojesoqneb. Ojesosib olo bini nañgi anjam di qoreiyeqnub. Deqa mondoñ nañgi awai tulañ ugedamu oqab.

**22** Tamo ungasari nañgi di bauñ ti bel ti bul. Yawo anjam endegsi unu, “Bauñ nañgi ñiloqnsib olo pu-luoqnsib nañgo ñilo uyeqnub.” Yawo anjam bei dego unu, “Bel nañgi yaq di yaloqnsib olo boqnsib jagiq di briñeqnub.”

### 3

#### *Tamo Koba Yesus a olo bqas*

**1-2** O ijo was bole, e nami anjam bei neñgreñyosim nuñgoq qariñyem. Bini e olo anjam endi nuñgoq qariñyonum. Nami Qotei aqa medabu o qaji tamo nañgi anjam palontoqneb. Tamo Koba Yesus agi iga elenjeq qaji aqa wau tamo nañgi dego anjam palontoqneb. E nuñgo areqalo tigeltetñigitqa ningi nañgo anjam deqa olo are qaliy. E deqa anjam endi nuñgoq qariñyonum.

**3** Ariya e na anjam kobaquja bei niŋgi merŋgit poiŋgem. Mondonj diŋo bati jojomoqnimqa meqe meqem tamo naŋgi boqnsib naŋgo segi areqalo uge uge dauryoqnsib misiliŋ anjam endegsib maroqnqab,

**4** “Qotei a nami marej, ‘Mondonj Kristus a olo bqas.’ Ariya a qabi unu? Niŋgi uniy. Gago moma utru naŋgi moreŋoqneb bosi bosiq agi bini iga degsi unum. Qotei a nami mandam atej agi bini mandam a degsi unu. Deqa Kristus a qabi unu?”

**5** O ijo was, meqe meqem tamo naŋgi di tulanj nanariosib deqa naŋgi anjam degsib maroqnqab. Nami Qotei a anjam marnaqa laŋ brantej di naŋgi poinjrosai. Qotei a olo anjam marnaqa mandam a ya ambleq di brantej di dego naŋgi poinjrosai.

**6** Noa aqa bati qa Qotei a olo marnaqa ya koba dosiqa mandam ya maqosiqa iŋgi iŋgi kalil padaltej.

**7** Bini laŋ ti mandam ti tariŋoqnsib unub. Tariŋesoqniqbqa mondonj Qotei a olo anjam marimqa naŋgi ɻamyuwo na yusib koboqab. Bati deqa Qotei na tamo uŋgasari a qoreiyeqnub qaji naŋgo une qa peginjrsim naŋgi torei padaltnjrqas.

**8** O ijo was bole, niŋgi ijo anjam endeqa olo are walŋgaiq. Qotei aqa areqalo agiende. Bati qujai a wausau 1,000 dego kere. Wausau 1,000 a bati qujai dego kere. Bati qujai ti wausau 1,000 ti naŋgi ombla kerekere.

**9** Ariya tamo qudei naŋgi endegsib mareqnub, “Tamo Koba Qotei a nami iŋgi bole bole iga egwa marej. Kiyaqa a iŋgi di iga egwajqa tariŋoqnsiq laŋa sokobaiyeqnu?” Di sai. Qotei na tamo bei padaltqajqa arearetosaieqnu. Deqa a niŋgi kalil

are bulyqajqa marsiq lawo na niŋgi qa tariŋqoqnsiq unu.

### *Mandam ti laj ti koboqab*

<sup>10</sup> Diŋo bati brantimqa Tamo Koba a bajŋ tamo bul urur boqujatqas. Bamqa bati deqa laj a poŋosim koboqas. Ingi ingi kalil Qotei na atej qaji di dego ɻamyuwo na tulaŋ kaŋkanjam yusib koboqab. Deqa mandam ti aqa ingi ingi kalil ti olo bunu sqasai.

<sup>11</sup> Niŋgi are qaliy. Ingi ingi kalil degsi koboqas deqa e niŋgi kumbra kiye dauryqajqa mernŋgawai? Od, niŋgi kumbra endi dauryiy. Niŋgi nuŋgo segi jejamu Qotei yekritosib aqa segi kumbra boleq di soqniy.

<sup>12</sup> Sosib Qotei aqa bati koba brantqajqa deqa tariŋqoqniy. Bati di urur brantqajqa deqa niŋgi singila na wauoqniy. Bati di brantimqa laj a ɻamyuwo na yusim koboqas. Ingi ingi kalil Qotei na atej qaji di dego ɻamyuwo na tulanŋ kaŋkanjam yusib ya bulosib koboqab.

<sup>13</sup> Qotei a nami endegsi marej, “E na laj bunuj ti mandam bunuj ti gereiyqai.” A degsi marej deqa iga maŋwa di unqajqa tariŋqoqnsim unum. Laŋ bunujq dia, mandam bunujq dia kumbra bole tiŋtiŋ gaigai sqas.

*Niŋgi ɻam atoqnsib Tamo Koba Yesus qa tariŋqoqnsib soqniy*

<sup>14</sup> O ijo was bole, niŋgi maŋwa di brantqajqa tariŋeqnub deqa niŋgi Qotei aqa ɻamgalaq di tamo bole une saiqoji sqajqa singila na wauoqniy. Osib

niŋgi Qotei ombla areqalo qujaitosib lawo na soqniy. Soqnib mondonj Qotei a nuŋgo kumbra di unqas.

<sup>15</sup> Gago Tamo Koba a na iga eleŋqajqa deqa tariŋeqnu. Niŋgi di qalieqajqa deqa e anjam endi neŋgreŋyonum. Gago was bole Pol a dego Qotei na powo yeqnaqa anjam deqaji neŋgreŋyoqnsiq nuŋgoq qarinjyoqnej.

<sup>16</sup> Pol a gaigai anjam deqaji neŋgreŋyoqnej. Bole, Pol aqa anjam qudei iga poigwajqa wau koba. Deqa nanari tamo qudei Yesus qa naŋgo areqalo siŋgilatosai qaji naŋgi Pol aqa anjam di bubuly-oqnsibqa ugeugeiyeqnub. Osib Qotei aqa anjam kalil neŋgreŋq diunu qaji di dego ugeugeiyeqnub. Deqa mondonj naŋgi tulaŋ padalugetqab.

<sup>17</sup> O ijo was bole, niŋgi qalie, maŋwa kalil di brantqas. Deqa niŋgi geregere ñam atoqniy. Niŋgi ñam atqasai di dal anjam gotraŋyo qaji tamo naŋgi bosib niŋgi gisaŋgosib titŋgibqa niŋgi siŋgila na tigelesqa uratosib uloŋo uge.

<sup>18</sup> Gago Tamo Koba Yesus Kristus agi iga elenqe j qaji a niŋgi qa are boleiyeqnu. Niŋgi a qa qalieonub. Nuŋgo qalie di kobaqujaeme. Yim Yesus a olo niŋgi qa are tulaŋ boleiyoqnsiq. A riaŋ ti ñam koba tiunu deqa bini bati endi iga aqa ñam soqtoqñqom. Osim bati gaigai aqa ñam soqtoqnsim sqom. Bole.

**Yesus Aqa Anjam Bole 2000  
The New Testament in the Anjam language of Papua  
New Guinea, 2000 edition  
Nupela Testamen long tokples Anjam long Niugini,  
2000**

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

---

PDF generated using Haiola and XeLaTeX on 28 Dec 2024 from source files dated 31 Aug 2023

6bd977a8-0139-583b-a367-c04faf6223cc